

UPUMONI

IULAI-AUKUSO-SETEMA 2023

FOFO O LE ITA
FAAMOEMOE

MASINI FAIMAFAUFAU

O TOE FEAU
LAPATAI

AGAGA O
TAGATA
OTI???





AGAGA OLAOLA PEA

O se aoaoga ea a le Tusi Paia le oti o le tagata ae ola pea lona agaga?

ITULAU 12



MEA TUTUPU

- 4 MEA TUTUPU
- 6 MASINI FAI MAFAUFAU
PO LE TAGATA OLA?

O le lu'i o le tupulaga faatekenalosi

SOIFUA MANUIA

- 22 SOIFUA MANUIA MO

TAGATA UMA

Tala o le soifua maloloina e manua aih

FAATUATUA

- 32 FOFO O LE ITA
FAAMOEMOE

Aafiaga o le ita

faamoemoe i le soifua faaleagaga

- 38 O SE FAAMOEMOEGA
SILI I TAIMI UMA

E iai ea se toe foi faalua mai?

- 44 TUPU A'E I LE

FAATUATUA: SAUAINA PE O SE MEALOFA?

Eseesega o le faatuatua moni ma le a'oa'o sese o fanau ma aafiaga i lo latou tuputpu'a'e

MAFAUFAUGA

- 54 ESEESEGA O UPUMONI

MA MEA SESE

O le a le uiga o le Upmoni e tusa ai ma le Tusi Paia?

AOGA FETUSIA'I

- 52 AOGA FETUSIA'A'I

Fausia se sootaga e tumau ai le saili o le Upmoni a le Atua mo le faamanuiaga o lou agaga.

VALOAGA

- 24 O TOE FEAU LAPATA'I A
LE ATUA - VAEGA 1

UA SIAKI OE?

A o sauni e tuufatasia lenei lomiga o le Upumoni, sa faateia ma faanoanoa le agaga ia i latou na maliliu faafuase'i ou te iloa lelei. Ae o le tala sili ona faateia ai a'u o le fatausilia o i latou na maliliu i Amerika Samoa i le masina o lanuari lava ia. E tusa ai ma ripoti, e 38 i latou na maliliu ae o le toatele e mafua mai i le le siakiina o le tulaga o le soifuamaloloina. O se fuainumera sili lea ona toatele ma e molimauina e sili atu nai lo i latou na maliliu i Amerika Samoa i le taimi o le Koviti. O le itu e sili ona faateia ai, o nei maliu uma e mafai ona puipuia pe ana faapea e fai ni siaki i le falema'i e iloa ai le tulaga o lo o iai le soifua maloloina. I le tele o taimi e fai ai le tala ua "amia e le Atua se soifua." Ae e foliga mai o le tele lava o maliu e mafua mai i le faatalale ma le faatamala.

Na o le Atua e silafia le isi tala i se isi mea o lo o soso'o mai e matua faateia pea ai o tatou loto i le o'o mai o le oti le mafaufauna. Ae faapefeta pe afai o le isi mea matautia o le a'o mai e faateia ai o le o'o mai o le asiasiga a le oti ia te oe? O le mea moni lava, e tuaoi lava tatou ma le oti i aso uma. Po o le a lava le manaia o ni fuafuaga, tatou te le taumasina ma le finagalo o le Atua. Ae o le fesili taūa, e faapefeta le ola sauni ua e iai? O siaki lou soifua faaleagaga i aso faiso'o? O lenei faasoa e faauma e oe lava ia i lau tali i le fesili taūa lenei. Ae tau ina ia ou toe faamanatu ia te oe le lapataiga lenei a lesu, "O le mea lea ia outou nofo sauni ai; auā o le itu aso tou te le manatunatu ai e sau ai le Atalii o le tagata." (Mataio 24:44) A'o e pisi ma tautua le Atua i so o se mea, ia sili atu lou faaalu o lou taimi e faasa'o lou loto ma le Atua ma isi e le o lelei ma oe. O le sauni lena e te manatunatu ai peia i le Atua i taimi uma. ^②

Tipalelupo

TIPALELUPE TAPUAI

Faatonu

MEA TUTUPU

ASO FAAMANATU MO
MANU'A

AMERIKA SAMOA

I le tausaga 1900, na faataapeape ai le atu Samoa e pulega a malo tetele o Peretania Tele, Amelika ma Siamani ma avea ai Tutuila ma Aunu'u o ni motu i lalo o le pulega a le Malo o Amelika. Mulimuliane ia Iulai 16, 1904, na sainia ai e Eliasara Tui Manu'a ma faatui o Manu'a le feagaiga e tuuina atu loa motu o Manu'a i lalo o le faigamalo a Amelika. I le 1983, na aloia ai le aso faamanatu o le Sisigafu'a mo Manu'a. Ia manua le faamanatuina o le fu'a a Manu'a i le nei tausaga.




OCEANGATE EXPEDITIONS - ROLLINGSTONE.COM: AMERICAN SAMOAN FLAG | ENAVATO; YOUVERSION LOGO - LIFECHURCH.TV; TAIWAN PRAYER WARRIOR - CBN

LEILOLOA I LE TITANIC

LALOLAGI

Ua faamaonia le maliliu o nisi e toalima ina ua omia ma malepe le vaamaulu na malaga ai e matamata i le noafa i le alitai na goto ai le va'a o le Titanic. O i latou na maliliu ai e aofia ai le e ana le va'a, o ni faipisinisi, ma se tama ma sona atalii.—*Rollingtone.com*



TAPENA MO LE TAU

LAOLAGI

A o vevesi ai le taufaamata'u o le malo o Saina e faoa le motu o Taiwan, o lo o faapena fo'i ona le malolo ai tagata Kerisiano e finau i le tatalo. Ua tuufatasia uma ai ituaiga ekalesia Kerisiano eseese i ototnu o Taiwan e finau i le tatalo ina ia iai le laveaiga ma le galuega mana o le Atua ina ia aua ne i iai se taua e tula'i mai. O le popolega o se vevesi i le va o Saina ma Taiwan ona o le tele o se aafiaga i le lalolagi atao.—CBN



YouVersion

SILIA I LE AFA MILIONA UA FAAOOGAINA LE TUSI PAIA MAI LE UPEGA TAFAILAGI

LAOLAGI

O le Tusi Paia e taua o le YouVersion e maua fua i luga o upega tafailagi ma ua faatiliuina i gagana e 600. Ua silia i le afa miliona le aofa'i o i latou ua tuuina i totonusa o latou telefoni ma masini feavea'i faaonaponei. Ma ua maua i le silisa i le 200 atunu.
—Insider

AAPA ATU I LE LALOLAGI


Ua 8 piliona le faitaufaofa'i o le Lalolagi
(worldometer.com)

Ua 2.7 piliona le aofa'i o Kerisiano i le lalolagi po o le 34% lena o le aofai o le lalolagi.

A tuu faafeagai fuainumera nei, o lo o i luga, tatou te vaiai ai le tele tele o le galuega a tagata kerisiano uma e ao ona fai.

Faimai lesu, "E tala'iina atu foi lenei tala lelei o le malo i le atu laulau uma, e fai ma molimau i nuu uma; ona oo mai ai lea o le gataaga.

E faapefea ona e fesoasoani e faataunu lea galuega? Fesoota'i mai 694-699-4338.



SOURCE: KURT SNIBBE | Orange County Register

A white humanoid robot with a head mounted on a neck, and articulated arms, is positioned on the left side of the frame. It is facing right towards an elderly woman with short grey hair and glasses, who is seated on a couch. The woman is holding a white teacup with steam rising from it. In the background, there's a wooden coffee table with a white teapot and a small lit lamp. The scene is set in a dimly lit room.

MASINI FAI MAFAUFAU

POOLE

Tagata Ola

E mafai ea e le masini fai mafaufau ona suia le tulaga o le tagata i lana
auaunaga ma lona faaolataga?

TUSIA E LE FAATONU

Ao ou faimalaga atu i Aferika i Saute i le masina o Me, e 3 aso sa ou malaga mai ai i Amerika Samoa, Samoa e ui atu i Niu Sila, Ausetalia, ma Qatar ma aga'i atu ai i Johanesberg i Aferika i Saute. E matautia le tele o le suiga i vaaiiga i mea ua faia e tagata. Ae o se mea matautia na faaosofia ai le mafaufau, ina ua ou matamata i ni ata tifaga se lua i luga o le vaalele e tuli ai le taimi. Sa ou ofo ai i ni mea e le i mafaufauina muamua. O ni ata o masini ua fai ma ni vaega o aiga o tagata. O le isi, ua fai ava le tagata i le masini e foliga, talanoa ma faatino ona tiute pei lava o se fafine tagata ola. O le manaia o si fafine lea, e le tali upu ae faamaoni i ona tiute uma faa-nofotane. Ae o le isi ata, ua fai le masini o se uo mamae a se tamaititi ma avea o se tagata o le aiga. Ioe, o le mea lena ua oo iai le sogasoga o mafaufau o tagata.

Mao'a'e masini faimafaufau

I se suesuega na faia e le faapopotoga o le McKinsey Global Institute, na faaalia ai e silia i le 13% o le aofa'i o avanoa faigaluega i le lalolagi atoa, po o le aofa'i e 400 miliona le aofa'i o tagata o le a le toe iai ni galuega mai le tausaga 2016 se ia oo atu i le tausaga 2030. (Abcnews.go.com (ByMax Zahn February 13, 2023). E mafua mai lea ona o le tele o galuega o le a faatino e masini ua uma ona faapolokalama ma tuu iai o latou mafaufau e pei o le tagata. Ua faaigoaina faaperetania o le Artificial Intelligence (AI). E tusa ai ma se tasi

o alii aupitosili ona atamai ma mauoa i le lalolagi o Elon Musk, o le isi lenei o foafoaga a le tagata ua avea nei ma faamata'u sili i tagata ola uma i luga o le fogaeleele. E mafua lea ona e foliga mai ua amata ona faagaoi le masini ma mafaufau e pei lava o se tagata. O le faatupulaia pea o le atina'eina o ia ituaiga masini o le faatupulaia pea lea o le faamata'u i tagata ola ma lo latou malosiaga e faatino ai galuega ma faia faaiguata tatau mo le saogalemu ma le manuia o tagata lautele.

I le taimi nei, o le tele o falegaosi taavale ua faaogaina nei ituaiga atina'e. E fai uma e masini le tele o galuega i le faapiipiina o vaega taitasi o totoga se ia o'o lava i le tino o le taavale. E matua fesoasoani tele i le faatelevaveina o le gaosia o ni oloa se tele i se taimi pupuu lava ma ua sili atu lea i le aufaipisinisi ona e sefe ai le tele o le tupe ae vave le gaosia o so se mea.

Atina'e i Iapani

I le atunu o Iapani, ua mafai ona gaosia e se faapotopotoga se masini e foliga i se tagata. O ona auivi e fau i u'amea ae e fetia'i uaee i totonu e fesoota'i ai lima ma vae ma sooga uma o le tino aga'i atu i le iunite e pulea mai ai faaiguata ma gaioiga e pei lava o le fetaaiga o neura o lo o fesoota'i atu i vaega eseese o le tino mai le mafaufau o le tagata ola. Ona



PEOPLE TECHNOLOGY - ENVATO

“
...o le lu'i ai lea o le vaai i le faaolataga ma le gaioiga a Kerisiano...

ma talitonuga i le Tusi Paia.

A o ou iai i le aoga faa-mataupu silisili mai le 1998 aga'i atu i le 2001, o le fesili sa lu'i ai le laolagi o faifeau i ia vaitaimi, ma e faamatalaina le Tusi Paia, o le gaioiga faa Foma'i ma Saienisi ina ia faia se kopi o le tagata mai sona sele ola (cloning). Sa manatu o le lu'i tele lea i le FaaKerisiano ma le Tusi Paia talu mai le Evolusi. Ae o lea ua tatou o'o mai nei i le tupulaga o le Faatekenalosi, ua matua sili faaafe atu lona faigata ma le lavelave.

Masini ma le faaolataga

Ou te nofo lava ma manatunatu i le Atua ma Lana foafoaga mamana. Ae o lea ua fai e le tagata le faatusa o le tagata i lana lava auala. E faafoliga e kopi i le Atua ma lana foafoaga. Ae o le mea ogaoaga i lenei taumafaiga a le tagata, o le lu'i ai lea o le vaai i le faaolataga ma le gaioiga a Kerisiano

i le faauigaina o nisi o a'oa'oga o le Tusi Paia. Faata'ita'iga, e mafai ona papatiso se masini pe afai ae su'esue ma malamalama i le faaolataga a le Atua? Aua afai o le faaolataga ma le galuega togiola a le Atua e aofia ai mea uma o le foafoaga, faamata e aofia atu ai ma le masini aua o le a mafai ona mafaufau ma filifili?

Ae sili atu i lea, a manatu nei i le faigata o le tagata ma le loto tete'e faifaipea i le Atua, e matua sili faaafe atu le galuega a le masini e faalauiloa le talalelei aua e le tau faasufi ma faapele. Ae o le a galuega lava i luga o lona malamalama ua iai e faatatau i le talalelei. Ae o se finagalo ea lena o le Atua? Afai nei e filifili le masini e fai le mea sa'o i taimi uma, ma auauna atu i isi, tatalo i aso uma, alu e tapua'i i le malumalu ia aso tapua'i, fesoasoani ma agalelei i tagata puapuagatia e aunoa ma se totogi, o lona uiga e mafai ona tatou faapea ifo, e sili atu le Kerisiano o le masini nai lo le tagata ola.

Manatunatu lololoto pea iai...

A o ou tusi lenei faasoa, ua uma na faapolokalama le lisi o lauga, o pese, o ata faasolo ma polokalama uma o le Tusi Paia e lauga ai le tala lelei i luga o le Televise e faaoga ai masini faaonapo nei. Ua ou lagona lo'u lealava. Ae e le lagona e le masini se lealava. Ou te malolo i lo'u moega, ae o lo o lauga lava le Televise e ala atu i masini faaonape nei. Ou te toe ala mai, ma ou toe malolo ae le malolo le masini. E matua aoga tele masini faaonaponei i le momoliina o

le talalelei!

O le a se mea o le a ese ai le masini mai i le tagata pe a o'o ina iai lona mafaufau, lagona ma mafai lava ona filifili? E mafai ona tatou faapea o le tagata ola, o le toto, aano ma ivi na faia e le Atua i le efuefu ma le eleele ona manava lea iai e le Atua le manava ola i ona pogai isu. O le masini, o uamea ma elemeni ma ueafetaia'i solo, ma lona mafaufau sa faapolokalamaina e le tagata, ae ua mafai ona gaioi lava ia. E ola i le uila eletise. Ae peita'i, e leai sona sootaga ma le Atua.

OU te talitonu, po o le a lava le maoa'e o le masini ua faia e le tagata ma ua foliga mai e mafai ona ia faapei o se tagata ma sili lona gaioi e faatin galuega a le tagata, ou te faaatuatua pe a le Upu a le Atua. O le tagata o le palealii o le galuega mamana a le Atua. O le faaolataga a le Atua e mo le tagata. O masini, ua na o se fesoasoani e faaaoga e le tagata ia faatelevave galuega masani o aso faisoo, e aofia ai ma le faasalalauina o le tala o le faaolataga.

O le lu'i tele mo le tagata ola, e iai oe ma a'u, ia sili atu lo tatou ola ia foliga ia Keriso nai lo le masini. Aua i le faaiuga o faigamea a le Atua, o le tagata e faamasinoina e tusa ma le finagalo o le Atua. E le o le masini! Aisea? Aua o le tagata ola na tofia e le Atua e pulea mea uma o le foafoaga, e aofia ai ma le masini na ia faia. O le tagata na faia e le Atua i Lona faatusa paia. E le o le masini!

E toe faauau pea...

Tusia e Tipalelupe Tapuai®



MAIMOA

Faamoe




HopeChannel
AMERICAN SAMOA

Maimoa i luga o upga taialaga



POLOKALAMA E MAIMOAI



Fesoota'i mai mo nisi faamatlagi i le

684-699-4338



Agaga OLAOLA PEA ?

O SE AOAOGA EA A LE TUSI PAIA?

O LE A TONU LE UIGA O UPU A IESU NA FAI I LE PAGOTA I LUGA O LE SATAURO?

Luka 23:43 (Lomiga Tuai) – “Ona fetalai atu ai lea o Iesu ia te ia E moni ou te fai atu ia te oe o le asō ta te faatasi ai ma oe i parataiso.”

A faaliliu sa'o le ulua'i tusi na tusia ai le vaega lenei o le tusi a Luka, e leai ni koma ma ni faailoilo i le fuaiupu. E mafua lea ona o le gagana Eleni na tusi ai tusi i ia vaitaimi e leai ni faamamafa ma ni koma e faailoga ai vaega patino o le fuaiupu.

E moni lava e faatasi le pagota ma Iesu i Parataiso. O le eseesega o talitonuga, o le taimi e iai le pagota i Parataiso. E manatu nisi ua iai le pagota i le taimi nei mai le taimi sa maliu ai. Ae peita'i e fete'ena'i lea ma le a'oa'oga moni a le Tusi Paia. O le pagota o lo o i lona tuugamau se ia aulia atu le aso e toe afio faalua mai ai Iesu.

O LE A LONA UIGA MONI?

1. O LE OTI E FAATUSA I LE MOE PO O LE MALOLO

Faavaemautu o le a'oa'oga # 1: lesu

O le a'oa'oga o le oti ma le toetu na faamautuina e Iesu e le gata i lona maliu ma le toetu, ae faapea fo'i i ana a'oa'oga ma ana galuega faaola.

I le tala o lo o matua faamaonia ai le mana faatoetu o Iesu, o lo o Ia'tua le upu "moe" e faatatau i le oti o Lasalo.

Ioane 11:11 – 15. "11 Ua fetalai atu ia upu, a e mulimuli ane ua faapea atu o ia ia te i latou. O loo moe la tatou uo o Lasalo; a e ou te alu e fafagu ia te ia. 12 Ona faapea mai lea o ona soo. Le Alii e, afai o moe ia, e ola. 13 Ua fetalai Iesu i lona oti, a ua latou masalo ua fetalai o ia i le taoto ma moe...23 Ua fetalai atu Iesu ia te ia, E toe tu mai lou tuagane. 24 Ua fai mai Marea ia te ia, Ua ou iloa e toe tu mai lava ia i le toe tu i le aso gataaga. 25 Ua fetalai atu Iesu ia te ia, O a'u nei o le toe tu ma le ola; o le faatuatua mai ia te au, e ui lava ina oti, a e ola lava ia. 26 O tagata ola uma o e faatuatua mai ia te au, e le oti lava e oo i le faavavau; po ua e talitonu mai ea i lena mea?"

E le o faapea mai Iesu a mea ua alu Lasalo i le lagi. ae faimai o lo o moe. O lona uiga e ui ua fa po o iai Lasalo i le tuugamau, e leai se mea o fealualua'i ai sona agaga pe ua alu fo'i i se parataiso. Ae o lo o oti, pe o lo o moe fo'i.

I le tala lava e tasi, o lo o aumai

ai le talalelei e fatatau i le a'oa'oga o le toetutu o le auga o aute o le faamoemoe o tagata Kerisiano uma e faatuatua ia Iesu. Afai o Iesu le toetu ma le ola, e ao la ona tatou taula'i atu i le toetutu ae le o le manatu tatou te o sa'o i le lagi pe a oti. E le mafai ona iai se ola ia i tatou pe a oti se i vagana ua aumai e Iesu i le taimi o le toetutu.

Faavae mautu o le a'oa'oga # 2: Aposetolo o Paulo

O a'oa'oga uma a le auaposetolo e faavae mai i a'oa'oga uma a Keriso Iesu le Faaola. E leai se na ia faia ana lava a'oa'oga e aunoa ma se faaaliga faapitoa mai ia Iesu pe fete'ena'i ma le Feagaiga Tuai, le Tusi Paia o lo latou vaitaimi.

O le mataupu i ē oti e ta'ua so'o e Paulo i ana tusi i ekalesia i Tesalonia ma Korinito le upu "moe" e ave i ē ua oti. E le gata i lea, ae e o faatasi lava le upu moe, oti ma le faamoemoe o le toe tutu.

1 Tesalonia 4:13-18 – "13 Ou te loto ina ia outou iloa, le au uso e, i le mataupu i ē o momoe, ina ne'i outou faanoanoa, pei o isi e leai so latou faamoemoe. 14 Auā afai tatou te talitonu, ua maliu Iesu ma toe tu mai, e faapea foi ona aumaia e le Atua faatasi ma ia e o momoe ona o Iesu. 15 Matou te fai atu foi lenei mea ia te outou i le afioga a le Alii, o i tatou o e ola ma totoe pe a afio mai le Alii, tatou te le muamua i ē o momoe. 16 Auā e afio ifo mai le lagi le Alii lava, ma le alaga, ma le leo o le agelu sili, ma le pu a le Atua; e muamua foi ona

toe tutū mai o e ua oti o ia Keriso; 17 ona faafuasei lea ona aveina ae o i latou o e ola ma totoe, faatasi ma i latou i ao, ina ia fetaiai ma le Alii i le va nimonimo; ona tatou faatasi pea lava lea ma le Alii. 18 O lenei, ia outou fefaamafanafanai i nei upu."

E le gata e faaogaina so'o le upu "moe" e faatatau i le oti, ae o lo o faaoga fo'i ma le taimi o le toe tutu e taula'i iai le auga o le faamafanafanaga. I le fuaiupu 16, faimai "e muamua fo'i ona toe tutu mai o e ua oti o ia Keriso". E leai ni agaga e omai mai le lagi po o Parataiso o taua mai. Ae pei ona toe tu mai Iesu nai e ua oti, e faapena fo'i ona toe ala mai i latou i le tuugamau.

1 Korinito 15:20-23 – "20 A o lenei, ua toe faatuina mai Keriso i e ua oti, ua avea ma faapolopolo o e ua momoe. 21 Auā ua oo mai le oti talu le tagata, ua oo mai foi le toe tutū o e ua oti talu le tagata. 22 Auā faapei ona oti uma ia Atamu, e faapea foi ona faaolaina uma ia Keriso. 23 A e peitai e taitoatasina ma lona lava tofi; o le faapolopolo o Keriso lea, mulimuli ane o e o ia Keriso e toe tutū i lona afio mai."

O lona uiga afai e tupu le toe tutu i le aso o le toe afio mai, o se famoemoega sili lea e taula'i iai tagata Kerisiano uma. I le isi itu, e le ō gatasina le a'oa'oga o le ō o tagata i Parataiso ma le toetutu i le aso o le toe afio mai. Aua o ai e toe tutu? Ma o le a le uiga o le toe tutu pe afai o lea ua o i Parataiso tagata? E fete'ena'i ona uiga ma lo latou taūa i le faatulagalelei o fuafuaga a le Atua.

IRA_EVVA_GETTY IMAGES

Faavae mautu o le a'oa'oga # 3: Aposetolo o Ioane

E toe faamautinoa mai lava e Ioane i le tusi faai'u o le Tusi Paia, o i latou uma e feoti oi le Alii, e ave iai le upu malolo ma e iai lava lo latou faamoemoe. O le upu malolo o lo o faatusa iai le oti. O lona uiga e iai le taimi e toe ala mai ai le tagata. Ae fuafua lava i le taimi na oti ai. Pe o i le Alii pe na oti lava e aunoa ma le talia o le faaolataga e ala ia Iesu Keriso.

Faaaliga 14:13 – "Na ou faalogo foi i le leo mai le lagi, ua faapea mai ia te au, Ia e tusi, Amuia ē ua oti, o e ua oti o i le Alii e amata i nei ona po. O lea lava, ua fetalai mai ai le Agaga, ina ua latou "malolo" i a latou galuega tiga; o a latou galuega foi e mulimuli ia te i latou."

Faavae mautu o le a'oa'oga # 4: Feagaiga Tuai

Tanielu 12:2 - "E toatele foi o e momoe i le efefuef o le eleele latou te ala mai, o isi i le ola e faavavau, a o isi i le faalumaina ma le inosia e faavavau."

O feau faavaloga na ave e le Atua ia Tanielu tatou te mautinoa ai, e tumau lava le a'oa'oga faavae a le Atua. E momoe tagata uma i le tuugamau. Ae toe feala mai i le aso gataaga e iloa ai le taunuuga. Afai e sa'o e o i seoli pe o i le lagi tagata i le taimi lenei i o latou agaga, o le a tonu le uiga taua o le toe tutu ma le toe feala mai o tagata ua feoti?

2. E LEAI SE AGAGA O SE TAGATA OTI

O le talitonuga taatele o lo o iai nei i le faakerisiano e talitonu e olaola pea le agaga (immortality of the soul) o le tagata pe a oti. E faavae mai i le talitonuga o le tagata e le o se agaga ae o lona tino o lo o tauaveina le agaga e le mafai ona oti. O lea talitonuga e le o se talitonuga na afua mai i se mau o le Tusi Paia ae na sosolo ma ofi lemu mai i totonu o a'oa'oga faa-Ituaia mai i a'oa'oga faafilosofia faa-Eleni e ala mai i faiaoga laulioa o Sokarate(Socrate) ma Palato(Plato).(Werner Jaeger, "The Greek ideas of immortality", Harvard Theological Review, Volume LII, July 1959, Number 3).

Ina ua afio mai Iesu ma faatuina le ekalesia e le Auposetolo, e leai se a'oa'oga e tasi e faavae ai se talitonuga o se olaola pea o se agaga. Mulimuliane ina ua tupu ma ola le ekalesia Kerisiano ma ua mavae atu le au aposetolo, e tele a'oa'oga fou na faaoifi mai i le ekalesia e nisi o augatama. O le toatele o augatama e o'o mai i le taimi o St. Aukusotino (TA 354 – TA 430), sa aafia ma filogia o latou talitonuga i a'oa'oga faa-Eleni. Ae maise lava i le mataupu o le olaola pea o le agaga. O le vaitaimi tonu lea na ofi mai ai le a'oa'oga faapaupau lenei i le faakerisiano.

O lona uiga a oti le tagata, e le oti lava. Ae e ola i le isi siosiomaga e ala i le agaga e ola pea. Ae o lea a'oa'oga, e le maua i le Tusi Paia.

Faimai le Tusi Paia, ina ua faia le tagata: Kenese 2:7 – "Ona faia lea e Ieova le Atua o le tagata i le efefu o le eleele, ma ua manava i ona pogai-

isu o le manava ola, ona avea ai lea o le tagata ma tagata ola."

O le fomula lea o le faia o le tagata: Efuefu i le Eleele + Manava Ola (ruach/neshama) = Tagata Ola (nepesh). E le maua i le Tusi Paia se taimi na tuu ai e le Atua se agaga ese i se tagata. Ina ua faia e le Atua Atamu, e le i faia e le Atua se agaga mo Atamu, ae na avea Atamu ma se agaga ola po le tagata ola ina ua manava iai e le Atua le manava ola i ona ponaiisu.

O nisi o ulua'i faaliliuga mai le Eperu ma le Tusi Paia Faa-Eleni o le Septuagint (Septuagint) e pei o le Geneva Bible, Bishop's Bible, ma le King James Bible, latou te faaliliuina le upu Eperu o le "ruach" ma le upu "neshama" o le manava ola lea e faaogaina i le Kenese 2:7. O le upu "tagata ola" e sau mai le upu Eperu o le "nepesh".

Talu ai ona o le manava e le mafai ona vaaia, e tele ituaiga faaliliuga ua ave iai. Ae maise lava, o le upu Eperu o le "ruach" o le upu lava lea e tasi e fanau mai ai le upu e ave i le Agaga Paia o le Atua.

Na faatonu e le Atua Atamu ina ia aua ne i 'ai i le laau e iloa ai le lelei ma le leaga (Kenese 2:17). Ae o Satani, na ala mai i le gata, ua faaosooso ma faia le ulua'i pepelo i le fafine e le oti lava pe a ai le fua o le laau. O le faafeagai lea o le poloaiuga a le Atua.

O le mea lea, o le a'oa'oga o le agaga olaola pea, sa fanau mai i le pepelo muamua a Satani ina ia faasee ai le tagata. O se pepelo na afua

mai i Etena ma ua o'o mai lava i nei ona po ma ua taatele i le faakerisiano ma a'oa'oga faapaupau.

E le mafai ona momotu ese mai se agaga i se tino o se tagata. A oti le tino e oti fo'i le agaga. O le tagata ola (nepesh) o le tagata lava lea e aofia ai ma le manava ola. O le upu lea a le Tusi Paia: Failauga 9:10 – "O mea uma ua e iloa e faia e ou lima, ina faia ia ma lou malosi; auā e leai se galuega, po o se mafaufau, po o se iloa, po o se poto i le tuugamau, o loo e alu atu i ai."

O i tatou o tagata e oti (mortal). O le mafuaaga lea e faimai ai le Tusi Paia "Auā e tatau ona ofu o lenei tino iu vale i le tino ola pea, ia ofu foi lenei tino oti (mortal body) i le tino le oti lava (immortal body)" (1 Korinto 15:53), auā tatou le i omai ma ni tino ola pea ina ua agasala Atamu ma Eva. Faimai le Tusi Paia, e na o le Atua lava e soifua pea lava pea (1 Timote 6:16). Ua na o ia lava na te toe aumaia le ola.

3. E LE O IAI LE PAGOTA I LE PARATAISO

O le a tonu la le uiga o le Luka 23:43? "Ona fetalai atu ai lea o Iesu ia te ia E moni ou te fai atu ia te oe o le asō ta te faatasi ai ma oe i parataiso."

I le malamalamaga o le a'oa'oga moni a le Tusi Paia e faatatau i le oti ma le toetetu, e manino ai o le uiga o le Luka 23:43, e mafua le fesētaiga ona ua faauiga le fetalai a Iesu e faafetaui ai le a'oa'oga taatele o le agaga o le pagota e alu i Parataiso.

Peita'i o lea a'oa'oga e le mai le Tusi Paia.

FAALILIUGA SA'O

Luka 23:43 – Eleni i le FaaSamoa (Literal translation-Faaliliu upu i le upu)

καὶ ἐπεν οὐτῷ
Ona na ia fetalai ia te ia

Ἀμήν Σοι λέγω
Amene (E moni) ia te oe ou te fai atu

σήμερον μετ' ἐμοῦ ἔσῃ ἐν
i le aso nei faatasi a'u oe o le a

τῷ Παραδείσῳ
i (totonu) Parataiso

Tuufaatasiga o le Fuaiupu

"Ona fetalai atu lea o la (Iesu) ia te ia (gaoi), E moni, ou te fai atu ia te oe i le aso nei, o le a faatasi oe ma a'u i Parataiso."

O le tuu o le koma i tua o le "nei", e manino lelei ai le uiga o le tala a Iesu i le pagota ma e o gatasi ma ana a'oa'oga uma lava e faatatau i le mataupu o le oti. Manatua sa leai ni koma i le ulua'i tusia o le Feāgaiga Fou i le gagana Eleni. E manino lelei le uiga o le fetalai a Iesu pe a vaai i le ulua'i gagana na tusia ai, ma faatulaga lelei le koma i le fuaiupu ina ia sa'o lona uiga ina ia o gatasi ma le a'oa'oga ma talitonuga lautele a le Tusi Paia e faatatau i le mataupu o le oti ma le toe tutu. Ma e leai se aoao-ga e faatatau i le agaga olaola pea.

Tusia e Tipalelupo Tapuai Ⓛ

AUAUNA

TAUSIMEA

A LE A ATUA



Tle amataga o le tausaga 2020, sa taumate pe o lea faama'i o le Koviti. Na matua le mautinoa ma mautonu pe o a ni aafiaga ogaoga o lea vairusi ma faapei le tali iai o tagata.

E oo mai i le ogatotonu o le 2020 ua faamalosia le talitonuga ua ola faatasi tagata ma aafiaga matuia o le Koviti. Na matua faataligoligoa e le Koviti-19 taulaga ina ua tapu uma ni feaoaiga, ma ua leai ni feaoaiga faavaomalo i vaalele, ma foliga mai ai ua le toe taavili le lalolagi.

A o taofi faigalmalo, fefaaatauaiga ma olaga masani o tagata, sa maitauina le faaoga e tagata o upega tafailagi e vaaia ai le itulelei o le olaga faifaimalie ma le filemu o le lalolagi. O le olaga faifailemu na maitauina e iai ona itu taua ma aoga tele. E fai ma faataitaiga le laumei patua uliuli e maua i le atunuu o Thailand. Na ripotia e le Nusipepa o le "The Guardian" faatoa toe vaaia lea ua tele faamoega o ia laumei mai le fia o tausaga o tau faasao. Na mafua lea ona ua matua leai ni turisi i mafagaga ma ua saoloto ai le feoa'i o meaola i ia nofoaga.

E tusa ai ma faamaumauga a le NASA, na matua tele se suiga i le vaaiga i luga o Saina mai satelite e vaaia le faaleagaina o le ea ona ua faaitiitia le kasa oona o le naitorokeni (nitrogen). O le kasa oona lea e maua mai i taavale afi, falegaosimea, ma faleeletise. Faimai tala a tagata atamamai su' esu'e o le faaitiitia

o le faaleagaina o le ea e mafua mai i le telegese o fefaaatauaiga e mafua mai i le tapunia o le lalolagi ona o le faama'i. O le faaititia o ia aafiaga leaga i le siosiomaga na maitauina foi i le atu Europa ma Italia ina ua faia tapu e tapunia ai mea uma.

Na matua lofia lugia o upega tafailagi i ata o le aai o Los Angeles ona ua pu'e e tagata ata o se mea fou ia i latou le leai o ni ausa ma ni kasa e puaoa faasoloatoa ai lea aai. Ae o Italia, na pu'e ai e tagata ata o nisi o meaola ua faatoa toe vaaia lea ua tele i le sami o le aai o Viena ona ua leai ni va'a e feoa'i ai. O le nonofo o tagata i o latou fale ma ua le toe feoa'i o se faamama avega lea mo le siosiomaga.

Ou te leiloa ia te oe ae mo a'u lava ia e faaosofia ai le lagona o le matuu atu o se avega ma iai se faamoemoe. I don't know about you but hearing these stories inspires in me a great sense of hope and relief.

Aisea e ao ai ona tatou tausia lelei lo tatou paneta? Faimai nisi o tagata ola e manatu faapito ma na maitauina i mea sa tutupu i le siosiomaga i taimi o e tapunia o le lalolagi le leai o se mea e mafai ona faia mo le tagata e puipua ai le siosiomaga. Ae ou te manati o le manatu tupito lava o tagata uma o le manua o le lalolagi ma le siosiomaga.

I e tusi o Kenese, o lo aumai ai le tala o le amataga o lo tatou lalolagi. Tatou te vaaia ai le Atua o faia ma le matagofie tele le la, fetu, masina, laau, ma manu felelei ma fetolofi. Na ausia le tumutumuga o Lana foafoaga ina ua faia le ulua'i tane ma le fafine, o Atamu ma Eva.

O lo o tau mai e le Tusi Paia ia i tatou na avatu e le Atua le pule ia Atamu ma Eva le pule e vaaia ai le foafoaga fou na ia faia. O le upu "pule" i la gagana faaperetania e iai ona itu le lelei - ona tatou te manatu ai i isi taimi o le uiga o le pule o faomalo lea ma pulefaamalosi mea uma e aunoa ma se fuafua ma faifaataua lelei. Ae o le uluai uiga i le gagana Eperu o lo o tusia ai le vaega lea o le Tusi Paia, e laititi lava se faatatau i le fetalia'i o manaoga o le tagata ma le siosiomaga, ae matele i le tofi ma le tiute o tagata ina ia tausia lelei le foafoaga.

O le mea lea, o le tiute na ave i tagata o le tausia lelei lea o laau, vaomatua ma meaola uma, ae le mo na o tagata. E le o so tatou lalolagi, ae ua tofia i tatou e le Atua e pulea lelei lana lalolagi ma mautinoa e matua manua ma lausiusi le ola i mea na ia faia. O mea uma lava tatou te faia e ao ona i totonusi o puipui o le fesili lenei, E manua ai ea le lalolagi i na tuuina mai tatou te vaaia ma tausia? E le faapea ona o i tatou o ni tagata e

puipua le siosiomaga ona o se mea e ao ona fai, ae ona o le tatou alolofa i le Atua ma Lana foafoaga.

E iai le igoa o lea matafaioi, o le Auauna Tausimea. O le uiga faigofie o le Auauna Tausimea o le fai o le mea sa'o i le faatinoga o le pulea lelei o le punaoa ma alamanua ua foa'i mai e le Atua. I le avea ai o tatou ma tagata Kerisiano, tatou te talitonu o le punaoa ma le alamanua uma e e tupuga mai i le Atua, ma e iai la tatou matafaioi i le tausia lelei o ia mea. Ma e faapea fo'i ona avea o se faatatauga mo i tatou lava ia taitoatas - i o tatou amioga e ilioa ai tatou, faamoemoega, moemitiga, ma mea tau ausi iai. Afai o le Atu le mataisau o mea uma, e pulea foi e ia mea uma, ae o tatou e tausia mo sina taimi tatou te aumau i le fogaelele.

Ina ua taofia uma e le Koviti-19 mea uma i le lalolagi na aafia o tatou ola, sa seleselai ai ni itu lelei sa le i mafaufauna mo le siosiomaga. Tatou faamoemoe ia toe lalaga ai le manatu e l o tatou e ana le lalolagi, ae ua na o ni tausimea lelei ua tuuina mai ai le faatuatuaga e tausia lelei mea a le Atua na foa'i mai.

Tusia e Lyndelle Peterson i le Signs of The Times
Iuni 2021.

SOIFUA MANUIA

mo tagata uma

TUSIA DR SIMONE KOOKE



FOFO E LE TAUSAMI FUALAAU LE PAPALA AATI

Ua toetele e faaogaina le taumafa e maua mai na o laau ma o lo o maitauina le faatupulaia o le aoga mo tagata soifua. E iai se tina i Niu Sila na mai'i i le 12 tausaga i le papala aati o ona vae. Ina ua faamaoni e tausami na meaa lava e maua mai i laau, ma faaititia le ga'o, na vaafia le manuia o lona gasegase. Ae ina toe fo'i i le tausami masani, na vaafia le toe ola o lona mai'in ua vave ona tuu le taumasami fualaua.—BMJ Journals



TIALE MA LE MA'I FATU

E le o se lagona lelei le oo o le tina i tausaga tiale ma le tupu o le tino puta i nisi. Faamauina e tagata su'esu'i Amerika le vaaapiapi o le alatoto i le faiai pe a tuputele le puta i tina ua maua i le tiale. Ae ua faamaonia fo'i e susuega. o le pulea lelei o le tino puta ma tuutuu i lalo le mamafa, e faaititia ai le mimini o le alatoto i le faiai ma sefe mai ai tina i le ono maua i le stroke. —Journal of North American Menopause Society



OVAGALUE LE FATUGA'O


Ua maua i suesuega a fomai lapani o le faaititia i le 25% o le faaoga po o le tausami i le masima e tau le mate'ite'i ai i le valuapo ona ua le toe soona galue le fatuga'o. O le a maua se malologa lelei pe afai e faaititia le tausami i le masima.—Nature.com

I-YUANMI, NADINE PRIMEAU, TIM MSSHOLDER, DANIEL ALVESD, THOMAS MILLOT—UNSPLASH, ANILO



'ONA LE U A LE PI

I Ausetalia lava ia, e tele manu ma iniseti faalafua e popole iai, ae o le popolega sili lava pe a u oe e le pi. E sili atu tagata e o i le falema'i ona ua osofa'i e se pi po o se faamoega pi nai lo se isi lava ituaiga osofaig mai manu faalafua. E sili atu nai lo i latou na aafia i se u a se gata po o se apogaleveleve. Ona o le tele o aafiaga i ia ituaiga osofaiga mai manu faalafua, o se fuafuaga atamai le faatafa mamao ma aua le alu i nofoaga e maua ai faamoega pi.—AIHW



MANAIA LE SUA O LE MOLI

Afai sa e manatu o le tasi lau ipu sua moli (ornage juice) i le taeao o se inumaga lelei lea mo oe, e sese lea manatu. Ua toe ililo nei e foma'i i Ausetalia ma Niu Sila inumaga o sua o fualauaina e fua i le suka o lo o maua ai ae le o mea e gaosi ai. Mo le tasi le ipu sua moli, e 21g le aofa'i o le suka (ae 25g le aofa'i fautuaina i le aso), ma e taua le sa'o o le fua o inumaga ina ia faatumaina le soifua maloloina lelei.—AusDoc



FUA LOU SOIFUA MALOLOINA

Ua mafai nei e fomai i Pretania ona faaoga se polokalama e e tuui i telefoni e fua ai le sologa lelei o tulivae o i latou e aafia i ma'i o sooga o ponaivi. E mafai ai ona fua le gaioiga i aso uma ma vaaia ni suiga lelei pe le lelei fo'i. Ae e mafai ai fo'i ona fesootai ma mataitauina e foa'i ponaivi mai le falema'i pe afai e iai se fesootaiga o lau polokalama ma se faaptioa mai le falema'i. E fautuina mai lava e le foma'i mea uma mo le solologa lelei o lau polokalama.—JAMA Network



O Dr Simone Kooke o se foma'i i Sini, Ausetalia. O se tutisala mo le nusipepa i le Signs of the Times. O le Signs of the Times o le Paaga a le tusi faasatalau o le Upumoni.



O Toe Feau Lapata'i ALE ATUA

*"O le malamalamaaga i feau faapitoa mulimuli a le Atua
i tusi o valoaga e aumai ai le mautinoaga i le galuega
faaiu a le Atua mo le faaolataga a'ia'i o le lalolagi."*

3AM PROJECT - HOPE INTERNATIONAL

Iaugatupulaga uma i le tala faasolopito, e aumai faasolosolo e le Atua feau e fetaui mo lea auga tupulaga ma lea augatupulaga e talafeagai ma Lana fuafuaga tele o le faaolataga. E le gata i lea, e faapitoa ma se galuega e tuuina atu ia i latou na te filifilia e tauaveina le galuega faapitoa mo le galuega lava o le laveaina o tagata mo Ia.

A o tatou iai i se augatupulaga o lo o tele ai le vevesi i tala feavea'i o taua, faama'i pipisi, faalavelave faanatura, ma le faatete-leina o le leaga i lalolagi ua iai nei, ua fesili ai nisi: pe ua tatou iai ea i taimi o le iuga? E tusa ai ma le Tusi Paia. Ua tatou iai nei i taimi o le iuga.

Se i o tatou maimoa atu i sina taimi puupuu lava i le tusi o Tanielu ma Faaaliga o lo o lapataia ai i tatou i mea tutupu. A o tatou suesue iai, tatou te maua ai ni feau faapitoa ma se galuega faapitoa mo tatou i aso tauaifi o le tala faasolopito o le lalolagi.

Ina i manino ma malamalama i ia upumoni i valoaga, se i o tatou vaai atu i siosiomaga taua i tusi nei.

Pe a ma le silia i le 2,500 tausaga talu ai, na valaauina ai e le Atua Tanielu i lona olaga taulealea mo

se galuega fapitoa. O le taūa o lea valaauina e taofa'i ai lona taimi se ia o'o mai lava lona mamao i ona po nei.

'Ai le tusi? Oona, ae toe suamalie fo'i? O le a le uiga o ia upu?

O lona vaevaeina lenei.

E pei ona taua i luga, o le "tusi itiiti" lenei, o le faatusa o valoaga na ave e le Atua ia Taniel e taoto ai le valoaga e 2,300 tausaga. E tapuni i le taimi o Tanielu ae faatoa tatala pe faatoa faailoa lona uiga i aso o

le iuga. Na faatonu e le Atua Tanielu e pei ona taua i le Tanielu 12:4 - "A o oe Tanielu e, ia e pupuni o ia upu, ma faamaufaa-ilogaina le tusi, seja oo i ona po o le iuga:" Pe a su'esu'e le siosiomaga atoa o le iunite lea o le tusi o

Tanielu, e amata mai lava i le Tanielu e 8, lea o lo iai le valoaga aupito i umi ona tausaga faatulagaina, se ia o'o ina faauma le tusi i le Tanielu 12. Tanielu 8:14 - "Ona faapea mai lea o ia ia te au, Seia atoa afiafi ma taeao e lua afe ma le tolu o selau, ona faapaiaina ai lea o le malumalu." Tatou te iloa o le fatauina o aso faavaloga e tutusa le aso e tasi ma le tausaga e tasi i le faauigaina o taimi

ma tausaga i valoaga o tusi o Tanielu ma Faaliga.

Na suesueina e ni Kerisiano i vaitausaga o le 1800 valoaga nei ma faataatauina vaega taimi e taofa'i e le 2300 tausaga ma manatu ai e afio mai Iesu i le iuga tonu o ia tausaga umi. Ma e pa'u tonu i le 1844.

E pei ona taua e Ioane i le tusi o Faaaliga, o lea malamalamaaga na suamalie i le tofo i le vaega taimi tonu na maua ai le iuga o le 2300 tausaga, e pau tonu ia Oketopa 22, 1844. Mo i latou lava ia na nofo sauni, faatali ma le faamoemoe, e foliga o se mea suamalie ma le faamalieloto le afio mai o Iesu i lo latou taimi. Peita'iane, ina ua pasi le aso na taunu iai le iuga o le 2,300 tausaga, e le i afio mai Iesu. Na avea o se aso sili ona faanoanoa mo i latou. Ma ua oona ai mea uma. O se aso Faanoanoa Tele, lea aso.

O le mafauaga na le afio mai ai Iesu ona na misi ia i latou nei na suesueina le valoaga nisi vaega taūa o le malamalamaaga i le Tusi Paia ma lona faauigaina. E iai le isi gagana faavaloga e le i mafai ona latou faauigaina i le Tusi o Faaaliga 14:16-12. O le vaega lea o lo o taoto ai Feau faapitoa a Agelu e Toatolu.

A tuu fatasi feau nei ona maua ai lea o le feau mulimuli a le Atua mo le tupulaga i aso nei o le iuga.

Atonu na le maua atoa e i latou na faatalitali le afio mai o Iesu i le 1844. Ae o le mea moni, o le latou saililiga na tapena ai le malamalamaaga o le feau mulimuli lenei.

Se i o tatou vaavaai atu iai i feau

nei ma malamalama ai.

Feau a le Agelu Muamua:

Faaaliga 14:6,7 – O le feau lenei e folafola atu ai le talalelei e faavavau ma le faamasinoga a le Atua ua o'o mai. Ona faatonu atu lea e le agelu tagata uma: "Ia outou matatau i le Atua, ma avatu ia te ia le viiga, auā ua oo mai le itu aso o lana faamasinoga; ma ia outou ifo i le na faia le lagi, ma le fanua, ma le sami, atoa ma puna o vai."

I aso nei i tusi faasaienisi a a'oga a le malo. O lo o a'o'o ai i fanau aoga le talitonuga Faaevolusi e pei ona tusia e le tagata o Salesa Tarini (Charles Darwin). O le talitonuga e faavae mai i le talitonuga e leai se Atua ma e le i iai se isi na foafolina le lalolagi ma mea uma o lo o iai. Ua ofi mai fo'i i le faakerisiano ma ua iai a'o'o Kerisiano ua a'o'o o le lalolagi na muamua le evolusi sosoo ai ma le foafaoaga. O lenei aoaoga e le gata e faaleaogaina ai le galuega foafoa a le Atua, ae faapea foi ona faaleaga ai le uiga moni ma le amio a le Atua.

O le feau a le agelu lenei e faamalosi ai ma unai tagata uma na foafoa e le Atua ina ia amanaia le Atua Foafoa ma ia talitonu atu i Lana foafoga na faia i aso moni e 6 ma malolo ai i le aso fitu. O lona uiga fo'i la e ao ona faamamafa ma amanaia le aso na malolo ai le Atua mai ana galuega, le aso Sapati.

I le faatoaga i Etena, na vavae ese lava e le Atua le Aso Sapati i le aso fitu o se aso malolo mo le tagata e fiafia ai ma vaavaai atu i le matagofie



o le galuega o Lana foafoga. O le feau a le Atua o le toe faafō'i lea o i tatou e tapua'i i le aso lea ma amanaia Lana pule, ma Lona mana foafaoa, o Ia o lo tatou Atua moni e toatasī.

Feau a le Agelu Lona Lua:

Faaaliga 14:8 – O lo o alaga mai ai le agelu ua pa'u Papelonia. O Papelonia o se malo na iai i le pe a ma le 2000 tausaga talu ai. E le o toe iai Papelonia i le taimi nei. E o'o lava i le taimi na tusia ai le tusi o Faaaliga (T.A. 100), ua mou atu Papelonia le aai tele sa iai. O ai la Papelonia o lo o taua i le feau a le agelu? Manatua o lea e faaaoga le gagana faatusa e faatusa iai uiga faapaupau o Papelonia. I le tusi o Tanielu, o Papelonia o le atunu faapaupau e ifo i tupua. Na latou ave faatagataotauaina le nuu o le Atua ma faamalosi e tapua'i i o latou atua ma tupua. Ae o i o lo o faatusa ai i tapuaiga sese uma o lo o iai nei.

I le vaega lenei o le feau a agelu, o Papelonia o lona uiga o ekalesia uma o lo o a'o'o seseina mataupu silisili o le Tusi Paia mai lava i le taimi o le pogisa o le ekalesia Kerisiano se ia oo mai i le aso lenei. O sese nei o lo o a'o'o ai le malamalamaga sese e faatatau i le Atua, ma ua tapua'i atu ai tagata i le Atua sese.

O nei aoaoga sese o lo o malosi pea le aoaoina ai o tagata Kerisiano. E aofia ai le aoaoga faaevolusi ma ona vala esesese ua lalaga faatasi ma aoaoga a le Tusi Paia faapea ma le aoaoina ma le faamalosia o le aso

tapua'i sese. O le talitonu i le evolusi ma le tausiga o le ulua'iaso o se aso tapua'i sese, o ni ata sese o le tapuaiga i le Atua. O i latou uma e teena le feau a le agelu muamua ma le feau a le agelu lona lua e mafuli lava ina talia le olaga faalelalolagi ma faapau-pau.

O le alaga a le feau a le agelu lona lua o le taumafai ia olega i tagata uma e sosola ese mai Papelonia. E le mafai ona manino i le faaseseega a Papelonia pe a le malamalamā a'iā'i i le talalelei. O le mea lea e taua ai tele le faamanino lelei o le feau o le talalelei e faavavau i feau a agelu nei e tolu.

O le faailoa a'iā'i o Papelonia moni ma ana taufaaseseega, e le faigofie. Aua e feagai ai nei ma le teena ma le inosia e le toatele o i latou ua nonofo ma le mafana i taufaaseseega a Papelonia. Ae ao lava ina talā'ina le talalelei ma le alofa ia faasaoina le lalolagi.

Feau a le Agelu Lona Tolu:

Faaaliga 14:9-11 – O le feau lona tolu e momoli atu ai se lapataiga manino ina ia aua ne i ifo i le manufeai ma lona faatusa, ma aua ne i maua lona faailoga. O le gagana faatusa fo'i o lo o faaogaina.

E faamaonia mai i le Faaliga 13, o le manu feai o le ekalesia ua pa'u ese ma faavae moni o le talalelei. O le ekalesia ua faalataina ma ua le toe amanaia le upumoni a le Atua o lo o faavae i le Tusi Paia. O le a le o'o i le loloto o le faauigaina o le vaega o le feau. E aumai i le isi lomiga. Ae mo le taimi nei, o le faatusa o le manu

feai o le malo o le Iunaite Setete o Amerika. Ae maise pe a o'o ina pulea e tapuaiga lotu le faigamalo ma avea ai le malo o se mea faigaluega e faataunu ana fuafuaga uma.

Ua silia ma le 200 tausaga o tulai pea Amerika o se malo e faalauiloa le saolotoga o tapuaiga. Ae tusa ai ma valoaga i le tusi o Faaaliga 13, e tula'i mai le pule lea e toe solitu lava lea mau i le saolotoga o tapuaiga ma faaoga ai loa e le ekalesia pa'u ese le malo e faataunu ona manaoga. Ma e so'o se tasi e tete'e i lana pule o le a faasalaina.

O le manufeai lea na te faamamalua ina le Tulafono i le tapuaiga i le aso sese, po o le tapuaiga i le ulua'i aso o le vaisedo, ua faaigoaina e Samoa o le Aso Sa. I le gagana faavaloga, e ta'u le aso lea o le faailoga a le manufeai. E ui lava e iai se ekalesia ua tautino o i latou na suia le Aso Sapati mai le Aso Fitu i le Ulua'i aso, faapea ma nisi ekalesia ua finau mai o le mafuaaga tatau e tapua'i ai i lea aso ona o le toetu manumalo o Keriso, ae e le maua i le Tusi Paia se poloaiga a le Atua e ala ia Iesu po o le Au Aposetolo e faamamalu ai lea aso o se aso malolo po o se aso tapua'i mo le Au Kerisiano.

I aso o le iuga, o le a faatupulaia le ita o ta'ita'i o ekalesia pa'u'u ese ona latou te le mafai ona finausa'oina ma aveese le mataupu o le famamaluina o le Sapati moni a le Atua i le Aso Fitu. Ma o le a sauaina ai ma saisaitia i latou e faamaoni i le tausia o le Sapati moni a le Atua. A o tutupu ia mea, o le a malosi ai le feau a le

“

**Na ia folafola mai
Lona Agaga e
fesoasoani ia i tatou
ina ia malamalama i
ana upumoni uma**



agelu lona tolu aua o le a vaia ai le faataunuina o valoaga e pei lava ona ta'u mai e le Tusi Paia.

Afai o se taimi muamua lenei ua e faitau ai i nei upumoni, atonu ua fai si tele mo oe ma taufaafefe ma le talitonuina. Ae aua e te popole! Ia taula'i pea lau vaai ia Iesu na aumaia feau nei e ala i valoaga o aso o le iuga. Na ia folafola mai Lona Agaga e fesoasoani ia i tatou ina ia malamalama i ana upumoni uma ma tatou faasoa atu ina ia lapataia le lalolagi uma i Feau a Agelu e Toatolu.

I le aso lenei, ou te valaaulia oe ia e tali atu i le valaau a le Atua e ala i lou faapea atu, “Ooe le Atua, ou te mafai mea uma i lou mana. Ou te fia malamalama atili i valoaga i aso o le iuga ma ou te fia faailoa atu feau a agelu e toatolu ma alofa i le lalolagi a fano. O fea lava e te auina atu ai a'u, o a'u lenei. Ia auina atu a'u.” Amene.

©Tusia 3AM- Hope Channel International

Mai le Faatonu: Toe tulimata'i mai mo le isi soosooga o le tatou feau lenei. O lenei feau faapitoa e mo tagata uma o lo o naunau e fia silafia le upu a le Atua e faatatau i aso o le iuga ma le faataunuina o valoaga. A iai se fesili po o se vaega e fia malamalama atili ai, ona fesooa'i mai le o le tatou ofisa i le numera 684-699-4338. E mafai foi ona e faafesoota'i se faifeau Asofitu lata ane i lou nofoaga, ina ia faapupula atili atu ia te oe le uiga o ia valoaga.
E mafai ona auina atu se suesuega faapitoa mo oe pe a e finagalo ai.

RYANLANE—GETTY IMAGES

IAKINA ADVENTIST ACADEMY

2023 - 2024

SCHOOL ADMISSION

REGISTER NOW

- CHRISTIAN VALUES
- QUALITY EDUCATION
- LOW STUDENT TO TEACHER RATIO
- LOW PRIVATE SCHOOL FEE
- BIBLE-CENTERED CURRICULUM

GRADES K - 12

684-699-1788

facebook.com/IakinaAdventistAcademy

A decorative graphic in the bottom right corner consisting of three wooden blocks. The top block is light brown with the letter 'B' printed on it. The bottom-left block is red with the letter 'A' printed on it. The bottom-right block is yellow with the letter 'C' printed on it.



PULEA LE ITA FAAMOEMOE

O le ita o se tasi o lagona faalenatura o le tagata. A le mafai ona pulea ma taomia lelei, e iai ona aafiaga tuga i le soifuaga manuia o le tagata. E faapefea ona pulea lelei le lagona ita ina ia aua ne i avea ma ma se faafitauli ogaoga o lou olaga?

Pe o le lata i le 9:00 i le po, ae lagonaina loa se leo ua laulogo ai uma lo matou vaiaai. O le tagata faasuaava o lo o faaumuumu ma ta'u le igoa o lo'u tama ma faaoga upu masoa uma i le gagana Samoa. E le i leva ae ou faalogoina loa ua nuti mai tioata. Sa ou le mautonu i lea taimi a o ou momo'e atu aga'i i lo matou fale pe o saogalemu lo'u tina ma i latou i le fale. Aua o le taimi lea o lo o malaga lo'u tama ma o'u uso matutua uma ae na o a'u lava ma nai teine fesoasoani i lo'u tina la matou faamuli. Ua na o a'u o se tamaititi 12 tausaga i le taimi lea. Na ou tamoe'e i le fale ou te fia iloa pe o saogalemu lo'u tina. Ae na ou vaaia le tafetotoi o le foloa o le fale ma le nuti lili'i o tioata.

Ae faafetai i le Atua, e ui i le matuia ma le mata'utia o se vaaiga i lea po. Sa leai se soifua na ma'umau o lo matou aiga po o le na faia le osofaiga. Peita'i, o lagona sa o'o ia te a'u mai lea taimi se ia o'o ina ou matua ma maua le malosi, o le ita faamoemo ma le taui ma sui. O lagona tiga ia sa le mafai ona alu ese ma o'u mafaufauga e uiga i le sa faia lea gaioiga. Aua e manino pea i lo'u mafaufau i taimi uma pe a ou toe to manatu iai.

O manatu aupito sili ona faigata ia te a'u, o le loto e faamagalo ai leaga sa faia e sea tagata i lo'u aiga. Ae maise lava le aafia ai o o'u matua. O upu masani e faapeea e sau le taimi ma ona faamalologa i se mafatiaga o se tagata. Atonu e moni lea manatu. Ae ou te faafetai i le talalelei ma

a'o'oga sili a le Alii Faaola. E ui i le pa'a o ia vaaiga sa ou vaai iai i aso o le tamaititi, ae ua ou matua ma le fiemu e aumaia e le Atua na aumaia le faamagaloga sili mo a'u fo'i ia le tagata agasala.

Na a'o'o tatou e le Alii Faaola o Iesu a tatou tatalo ia tatou faapea atu, "Ia e faamagalo mai ia te i matou, e pei ona matou faamagalo atu i e agaleaga mai ia te i matou." E foliga mai o le galuega o le faamagaloga e ala lua. O le isi o le mea e faia e le Atua. O le isi o le mea e fai e a'u. E le mafai ona tupu na o se mea e tasi. E ao lava ina tupu i le va o le Atua ma a'u, ma e faapena fo'i i le va o a'u ma le isi. O se uiga e ao ona iai i tagata Kerisiano uma le loto faamagalo aua e o faatasi ma a'o'oga o le alofa ma le foia ai o le lagona ita faamoemoe

E tofu uma tatou ma le mafuaaga e ita ai i se isi tagata. Tatou te le fiafia i tagata e vaai maulalo ia i tatou. Tatou te le fiafia i tagata e manatu lava e sa'o latou i mea uma. Tatou te le fiafia i tagata e te maua mulimuli ane o lo o faia ou tala. Tatou te le fiafia i tagata e fia tagata ae le tutusa ma le tulaga o lo o iai. Tatou te le fiafia i le tagata faalata ma agaleaga ia i tatou. Tatou te le fiafia i tagata e tomumu lava latou i so se mea ae e le fesoasoani e fofo ni faafitauli. Tatou te ita i tagata e faasaua ma agaleaga fua mai. Tatou te ita i se aiga si'i tuaoi. Tatou te ita i tagata e faoa faamalosi mea tortino a lou aiga. Tatou te le fiafia i tagata e faaoga tatou e manuia ai ma ta'u leleia ai latou. Ma e faaauau pea le lisi...

O mea e le fiafia ai tagata e ono avea lea ma mafuaaga e faavae ai le ita faamoemoe i le va o tagata, va o tuaoi, va o tagata faigaluega, va o le pule ma tagata faigaluega, va o faipule ma tagata o sona itumalo, va o matai i totolu o faiganu'u, ma isi lava va nonofo o tagata Kerisiano ma uso a tuaoi. E oo lava i le va o ulugalii faapea matua ma fanau. Ae sili ona faigata e o'o lava i le va o tagata ua ttau o tagata Kerisiano.

O le ita e eseese ma le ita faamoemoe. O le eseesege e maua i upu faaperetania e lua. O le ita o le natura o le lagona o le tagata e oso mai pe a iai se mea ua faia e se tagata e le talafeagai ma le isi tagata soifua. Ae o le ita faamoemoe o le ita lea e taofiofi i totolu o le loto ma tupu ai le loto tiga.

O le ita faamoemoe e afua ai le alia'e o ni uiga tuga ma le pa'a'a o tagata. O le aafiaga o le ita faamoemoe e o'oo'o lava ona tuga i le tagata Kerisiano. E iai i latou e nofo ma le loto tiga i se isi tagata e lolotu faatasi ona o se mea sa tupu i le tuana'i. E aafia lona saolotoga ma ona lagona taotaomia. Ma e o'o ai lava ina masua mai i ana upu, uiga faaalia, ma matuia se mea le mafaufauina e fai i le o lo o loto tiga ai.

Ua iai i latou ua aafia o latou soifua. A le o le faatupuma'i i le mafaufau, o le faaoolima ma le faatupuvevesi ma saisaitia ai i le tulafono, pe o'o ai lava i le maumau ai o le soifua. Ae sili i mea uma o le leai o se saolotoga i le mafaufau ma

le agaga e mafuta atu ai i le Atua i se auala vavalalata.

O le mafuaaga tonu lea o apoapoaga a le Tusi Paia e faatatau i le ita: Salamo 37: 8 - "Ina soia e te ita, ma ia tuu lou tiga; aua e te faameo, ne'i e faia se mea leaga." Iakopo 1: 19,20 - "...ia faagesegese ona ita. Auā e le tupu le amiontonu mai le Atua i le ita o tagata..." Efeso 4:26,27 - "A outou ita, aua le agasala ai; aua ne'i goto le la o ita pea outou. Aua foi ne'i tuuina atu e outou se mea e mautu ai le tiapolo." Faataoto 14:29 - "O le ua faatoatoa, e tele lona mafaufau; a o le ua itagofie, e faaeaina i luga e ia le valea."

E ui e iai mafuaaga o le ita, ae e te le maua i se a'oa'oga a Iesu se alofaga mo le ita faamoemoe i se isi. O le tofotofoga sili o le avea ma so'o moni o Keriso, o le mafai lea ona e alofa i le tagata e tatau ona e ita faamoemoe iai.

O a ni Upumoni mai ia lesu e foia ai le ita faamoemoe?

(Faitau le Luka 6:27-38, Mataio 5:43-44)

“

**E ui e iai
mafuaaga o le ita,
ae e te le maua i se
a'oa'oga a lesu se
alofaga mo le ita
faamoemoe i se isi.**

I. "ia outou alolofa atu i e ua ita mai ia te outou"

O le upu alofa o lo o faaogaina e Iesu i lana saunoaga faatonu lea, e ese mai i isi faaogaina o le upu alofa i le Feagaiga Fou. E tolu upu Eleni e faaoga so'o i le Feagaiga Fou a faaliliuina e tasi lava le upu faasamoa e ave iai o le "alofa". O upu nei o le "eros", "philia", ma le "agape".

O le uiga o le alofa "eros" o le tosina atu lea o le alofa i se isi e faananau atu iai le loto. O le alofa lea e tupuga mai i le faamalieina o le tuinanau i le matagofie, aulelei, faaleulugalii, taleni, ma isi lava itu faaletino e avaga atu iai le loto i se paaga po se e pele.

O le uiga o le alofa "philia" o le alofa e tosina atu i le isi tagata ona o mea taatele e fiafia iai. O le alofa lea e taatele i totolu o aiga i le va o uso i le uso ma le tuafine ma a latou uo e tutusa mea e fiafia iai. E pei o le alofa i le va o Tavita ma Ionatana. O le alofa i isi tagata na faia ni mea lelei i tagata e tatau ona alofagia.

O le alofa "agape" o le alofa lea e

lei se mafuaaga e pei o mafuaag o lo o i luga, ae e alofa e faavae i manaoga o le isi tagata. E leai ni ona manaoga faalilolilo ae e faaalia mea uma ma le loto fuatiaifo. E pei ona faimai Paulo i le ekalesia i Korinito, "o le alofa e le saili e ia ana ia lava mea." O le alofa lea e faaalia i le loto malie ma le fuatiaifo e saili se mea e lelei mo le isi tagata tusa pe o se tagata lelei pe o se fili ia te oe. I le Tusi Paia, so o se taimi e faatonuina ai Kerisiano ina ia alolofa, e faatatau i le alofa "agape" ae le o isi ituaiga alofa.

Ina ia faamamafa le uiga o le alofa "agape", na filifili lelei e Iesu se faataitaiga e le mafai ona faamatalaina e isi ituaiga alofa. Faimai a Ia, "Alوفa atu i e ita mai ia te oe...."

Pe a vaai lelei iai i le uiga o le mau lenei a Iesu, e amata ona e iloa lelei ai lou faafitauli. E mafai lava ona e alofa i ou fili tusa lava pe e te le fiafia iai, aua e mafai ona e pulea lou loto. Aua o le pulea lelei o le loto e faanofo lelei ai fo'i lagona.

O le mea lilo na toe faasoaa e Iesu i ona so'o i ana toe upu ae le i afio



atu e faalataina o ia, faasauaina ma faasatauroina, "Ia outou fealofani". I mataupu 14 - 16 o le tusi Evagalia a Ioane, o lo o iai folafolaga o le afio mai o le Agaga Paia o se Fesoasoani Sili. E o faatasi lava ma le faatonuga ia maua le "alofa" agape i ona so'o.

O lona uiga, e mafai ona maua le alofa "agape" e alofa ai i fili po o e ita mai, pe afai e malosi le mafuta atu i le Fesoasoani Sili, le Agaga Paia. A vaivai pe leai foi se mafutaga ma le Agaga Paia o le Atua, e le mafai lava ona alofa ie ita mai.

2. "...ia outou agalelei atu i e ua 'ino'ino mai ia te outou..."

Faimai se tuistusiga a se tasi faifeau Metotisi e suafa ia Eli S. Ioane (Eli Stanley Jones), e tolu vaega e fetalia'i ai tagata i lo latou va. Muamua o le faa-temoni - o le tali atu lea o le lelei i le leaga. Lua, o le faale-tulafono - o le tali atu lea o le leaga i le leaga. Ma le lona tolu, o le faale-Atua - o le tali atu lea o le leaga i le lelei. E le mafai ona tatou misi i le Feagaiga Fou le faatonuina o tagata Kerisiano uma ina ia taui atu le leaga i le lelei.

Faimai a Iesu, " Ia alofa atu i e o fai outou mo latou fili: ia agalelei atu i e ita mai ia te outou, ia outou faamanuia atu i e fetuu mai ia te outou, ia outou tatalo foi mo e tuua'i fua mai ia te outou..." (Luka 6:27-28).

O lo o apo mai e le Apostolo o Paulo lea lava manatu i lana tusi i le ekalesia i Roma. "Ia faamanuia atu i e faasaua mai ia te outou, ia faamanuia

lava, a e aua le fetuu....Aua le taui atu le leaga i le leaga i se tasi; ia sauniuni mea e tusa i luma o tagata uma lava." (Roma 12:14,17)

3. ...ia outou tatalo foi mo e ua tuua'i fua mai ma faasaua mai ia te outou." (Mataio 5:44)

Ua aumai e Iesu le auala e fofo ai lou ita. O le tatalo. Ae le na o le tatalo, ia tatalo mo le e te ita iai. O le natura lava ia o le olaga, o le tagata e tatau ona e ita iai e matua faigata lava ona e manatu e fai iai se mea lelei. Ae o lea ua a'oa'o tatou e Iesu i le faafeagai o le mea e tatau ona fai. Faimai ia tatalo mo le e tuua'i fua mai ma faasaua mai po o le e ita mai. E faigofie ea lea mea?

O le mafuaaga o taua, o misa, o finagua, ma fevaevacaiga, o le tele o loto tiga e mafua mai i le ita faamoemoe. E matua faigata lava ona ola faatasi tagata e iai mea e tiga ai i isi tagata. Ua le mafai ona lolotu faatasi. Ua le mafai ona toe nonono faatasi. Ua le mafai ona galulue faatasi.

Mo tagata Kerisiano faafoliga, ua fai alofaga solo ina ia tausi le filemu, ae o tua atu o ia mea uma, o lo o ufiufi ai le loto tiga ma le ita faamoemoe. Ua saili auala e alu ese ai ae o lo o alu lava ma le ita ma le tiga o le loto.

Faimai Iesu, "ai se ita fua i lona uso, e nofo sala o ia i le faamasinoga;" (Mataio 5:22). A faafafogie le fetalaiga a Iesu, "O le tagata e ita i lona uso e nofosala..."

Ae o le nofo tatalo, o se aupega sili lea e tineia ma faatoilalo ai le ita. Aua fo'i o le tele o lou tatalo mo le manuia o le tagata e tatau ona e ita iai, o le itiiti fo'i lea o lou toe

“

ai se ita fua i lona uso, e nofo sala o ia i le faamasinoga...

mafaufau iai. E le mafai ona e tatalo mo se tagata ae toe ita iai.

O lou tuuatu o se faafitauli e le mafai ona e faia i lou malosi i le nofoalii o le Atua, o le mea sili lea ua e faia mo lou faafitauli. Aua fo'i o lea ua siitia atu i le nofoalii o le Silisiliise. O le Faamsino Sili o mea uma. O le e Amitionou ma sa'o Lana faamasinoga.O ia fo'i e tu mo oe. O ia e taui ma sui.

O lou tatalo mo le manuia o le tagata e ita mai o le mea sili fo'i lea mo oe lava ia. E faasa'oloto ai lou mafaufau ma lou agaga mai le faapologaina ma le faleagaina e le loto tiga.

O lou tatalo mo lou fili, o lou ulufale atu lava lea i potu faalelagi e faaaupegaina ai oe i aupega faaleagaga. Ua e le toe tau i le tino, ae ua siitia atu nei oe i le maualuga faaleagaga. E te malosi ai ma e iloa atili isi mea sili faaleagaga e te le i iloa muamua.

O le tatalo o le vaega faapitoa o le soifua faaleagaga o le tagata Kerisiano e le mafai ona gaoia pe faoa e se isi mai ia te oe. Aua o le mea lilo lea e te malosi ai ma mafai ai ona e manumalo i le uiga faatemoni o le ita faamoemoe ma le loto tiga.

UPU FAAI'U

E le i maua se taimi ou te talanoa i le tama sa osofa'ia lo matou aiga. Na ou faau'u mai lava i aoga i atunu mamao ma galue ai lava i le galuega a le Atua ma le toe maua se taimi e toe foi ai lo matou nuu. Ae mai le taimi sa ou papatiso ai ma a'oa'oina nei uiga taua o le soifuaga faakerisiano, e le i toe iai se mafaufau e tasi e faalavave mai e uiga i le mea sa tupu.

E o'o lava fo'i i tagata o lo'u aiga, ua latou a'oa'oina le ola faatasi ma galulue faatasi ma le uso e pei lava e leai se mea na tupu. Ua gallo uma tiga ma le ita ona ua tineia e le alofa e fanau mai i le latalata atu i le Atua ma Lona nofoalii i taimi uma. Ou te fiafia e ta'u le sa aafia o so'u uso, o so'u tama, o se pele i le agaga. E le ona ua malolo lo'u agaga i le umi o le taimi talu ona tupu, ae o le mautinoaga e alofa Iesu ia te a'u e pei lava fo'i ona alofa i o'u fili. E tutusa uma a'u ma o'u fili i lalo o le tafu'e o le satauro. E manaomia uma le faamagaloga ma le faaolataga a le Atua.

Tusia e le Faatonu

②



O SE *faamoemoe* SILI I TAIMI UMA

*O le toe afio mai o Iesu o
se faamoemoega sili e le i
tupu muamua ae o le a tofo
iai ma le olioli i latou uma e
faatalitali atu ma sauni ma
le faamaoni.*

TUSIA: YEURY FERREIRA

Na faamatala e le tusitala ma le failauga o Max Lucado se tala faamomoiloto i se mea na tupu i le uma ai o le mafui'e lea na luluina ai Armenia i le 1989 – i le na o le fa minute na solo ai le eleele ae na faatamaia ai se vaega tele o le atunuu ma maliliu ai tagata e 30,000. Ina ua mavae le mafui'e tele na faanatinati atu ai se tamā i le aoga e lavea'i mai i lona atalii. Ina ua ia taunuu, na vaaia ua na o to'ega o le fale aoga ua faaleagaina uma. A o ia taumafai e saili lona atalii i vaimaa ma lapisi, na ia manatua ai se folafolaga na ia faia i lona atalii: "E leafaina poo le a le mea e tupu, ou te iai faatasi ma oe i le mea e te iai."

O lana folafolaga lea na una'ia le tamā, na ia maua le nofoaga sa iai le potu aoga o lona atalii, ua ia ao ese le otaota; Ua taunuu mai isi mātua ma amata ona saili a latou fanau. O le toatele o tagata na iai i le nofoaga, ma va'ai i le telē o le faatafunaga na latou

faiatu i le tamā: "Ua tuai", "E te iloa ua feoti uma i latou. E leai se mea e mafai ona toe fai." E oo lava i se alii leoleo na ia fautua ia te ia e aua le toe taumafai e saili lona atalii nofoaga, ma va'ai i le telē o le faatafunaga na latou faiatu i le tamā: "Ua tuai", "E te iloa ua feoti uma i latou. E leai se mea e mafai ona toe fai." E oo lava i se alii leoleo na ia fautua ia te ia e aua le toe taumafai e saili lona atalii.

Ae le i faavaivai ai le tamā. Ua maea le 8 itula, savali i le 16 itula, 22 itula, ma ua laasia le 36 itula; na ia saili pea ma saili pea. Ua manu'anu'a ona lima, ma ua mou atu lona malosi, ae na ia le faafiti ai. Mulimuli ane ina ua uma le 38 itula, o le tigaina ma le mafatia, na ia fuli ese ai se tasi o puipui tele lava ma ia faalogoina ai le leo o lona atalii. Na ia valaau ma le leo tele, "Armmman! Arm!". Ma ia faalogoina se leo o tali mai, "Tamā, o a'u lenei!" Ona alaga mai lea o le atalii ni upu matagofie

toe faamomoi loto, e faapea: "Na ou fai i isi tamaiti e aua le popole, afai o e ola, e te sau e lavea'i a'u; Ma e ala i le laveaina o a'u, e fa'aolaina ai ma i latou, aua na e folafola mai ia te a'u, e leafaina po o le a le mea e tupu, e te iai faatasi ma a'u." (Max Lucado. When Christ Come, Nashville, TN, Editorial Caribe: 2000. p. 21.)

Aisea e toe fo'i mai ai?

O le folafolaga lea na faia e le tamā i lona atalii na muamua ona faia e Iesu. Na ia fetalai ai, "...ou te toe sau, ou te talia foi outou ia faatasi ma a'u; ina ia i ai outou i le mea ou te i ai a'u." (Ioane 14: 3). O le Afio fa'alua mai o Iesu o le faamoemoe manuia mo le Kerisiano, ma ou te fia ta'u atu ia te oe, i le Feagaiga Tuai ma le Feagaiga Fou e tumu i folafolaga o le Afio faalua mai o le Keriso. Fa'ataitaiga, e 1,845 fa'amaumauga o lo o i le Feagaiga Tuai ma Tusi e 17 o loo faalauliloa ai lona toe afio mai.

I le 260 mataupu o le Feagaiga Fou e 318 faamatalaga e faatatau i le Afio Fa'alua mai, e faapea, e tasi mai le 30 fuaipu; 23 o le 27 tusi o le Feagaiga Fou e faasino atu i le faamoemoe manuia lea; ma soo se valoaga e faatatau i le ulua'i afio mai o Keriso, e tusa ma le 8 e faatatau i le Afio Faalua Mai. (Paul Lee Tan. Encyclopedia of 7,700 illustrations: Signs of the times, Bible Communications, Inc.: 1996. p. 1239.).


O le Afio faalua mai o le toe fo'i mai o Keriso e faataunuina valoaga uma. I lona Afio muamua mai, na avea ma Auauna ma Pologa. I

lona Afio faalua mai, o Ia o le Tupu Manumalo. I lona Afio muamua mai, na sau i le auala maualalo. I lona Afio faalua mai, o le a sau ma au a le lag i siomia o Ia.

I le tele o seneturi, na faatalitali ai ma le naunau le au Kerisiano i le faataunuina o le folafolaga o le afio mai o Iesu i lona mamalu ma le matagofie. O se tasi o tagata faatuatua na faatali atu i le toe fo'i mai o le Alii i ona aso o le Apostolo o Paulo. A o lata tele atu i le iuga o lona soifua ma lana auaunaga, na tusia ai e lenei toe manumanu a le Atua upu nei: Auā o a'u ua faamaligiina nei lo'u toto, ua lata ona po ou te alu ai. Ua ou tau le taua lelei, ua iu ia te a'u le tausinioga, ua ou taofi i le upu o le faatuatua. O lenei, ua teuina mo a'u le pale o le amiontonu, e foaiina mai ia te a'u i lea lava aso o le Alii le faamaisino amiontonu; e le gata foi ia te a'u, a o i latou uma lava o e fiafia i lona faaali mai. (2 Timoteo 4: 6-8)

Aisea e toe fo'i mai ai?

Aisea na faamalosia ai le faatuatua o Paulo e faatatau i le Afio Faalua Mai o Keriso? Aua sa ia te ia le alofa ma tulimata'i atu i le Afio Faalua Mai o le Alii! Le autalavou pele, o le e alofa e faatali. A alofa i le Alii e faatali ma le faamaoni i lona fo'i mai i lona mamalu ma le silisili ese. Ou te valaaulia oe i le asō e faatali ma le alofa le afio mai o le Alii. Ou te valaaulia oe e valaau atu i le Atua e tāpena oe mo le aso e faaali mai ai le Mesia i ao o le lag. O le tatalo ia faia e le Atua mo oe



le lagona na i ai i auauna a le alii milionea o Bennett, i le tala lea o le a ou faamatala.

Na tusia e Jill Jones se tala e faatatau i le alii e igoa ia James Gordon Bennett, o le milionea lomitusi i Amerika. I le 1835 na amata ai e Bennett se nusipepa logologoa e igoa o le New York Herald. E lua ona fale taugatā i Paris, ma ona fanua ma fale i Farani ma le vaa failā i Europa; ae e iai fo'i ona fale e tolu i le Iunaite Setete, e ui lava e le'i nofo ai mo le

“

Faatali ma
onosa'i aua so o se
taimi e afio mai ai
lesu i ao o le lagi...

silia i le 10 tausaga, ae na sauni lava auauna o lo o faigaluega i fale uma nei i aso uma mo le taunu faafuse'i atu o le alii o Bennett.

Na tusia e Jones:

I fale taitasi e iai uma le au faigaluega e moomia, o loo sauni e auauna mo Bennett i soo se taimi e ulufale faafuse'i ai i le faitotoa e aunoa ma se lapataiga: ua tutumu mea tuu uaina, o le afi ua momu saesae, ma ie afu e tapena i po uma. (Jill Jones. Eiffles Tower, Viking Adult: 2009, p. 199.)

E faapea le auala e tatau ona tatou

ola ai: faatali ma tulimata'i aua e soo se taimi e fo'i mai ai lo tatou Alii o Iesu Keriso i ao o le lagi ma le mamalu!

O Pr. S. Yeury Ferreira o se faifeau e galue i le Hispanic Ministry o se Faatonu i le Greater New York Conference ma o se Porofesa i Andrews University. Sa tusia e ia ni tusi se tele e aofia ai ma se faitauga mo talavou ia Mati, 2023 e faaautuina "O le Alofa o le Veape", o lo o siitia mai ai le feau lona 8 lenei o ana tususiga. - Ulua'i lomia i le Signs of The Times - Lomiga Juni, 2021

SU'E LAU TUSI PAIA

1. E mautinoa ea le toe afio mai o lesu? - Ioe: Eperu 9:28; Ioane 14:3; Mataio 26:64
2. E faapefea ona toe afio mai lesu? - Gal. 1:9-11; Mat. 24:30; Luka 24:36-43, 50,51
3. O ai e afio mai ma lesu? - Mat. 25:31; 24:31
4. O le a le mafuaaga o le toe afio o lesu i le lalolagi? - Faaa. 22:12; Ioa 14:3; Gal. 3:30, 21
5. O le a le mea e tupu i tagata amiontonu? - 1 Tes. 4:17; Fil. 3:20; 1 Kor. 15:51-53
6. O le a le mea e tupu i tagata leaga? - Isa. 11:4; Ier. 25:33

LESONA O LE FAAMOEMOE

Fofogaina i vaiaso taitasi

8:00 P.M. I PO TAITASI



www.asamtv.org



Fesootai mai
684-699-4338

TUPUTUPU A'E
i le aiga lotu:
SAUAINA PE
ALOFAGIA?

E ui i le tele o sauaga o fanau i aiga lotu,
e le mafai ai ona aveesea le taua o le
tausia lelei o fanau i totonu o aiga Kerisiano.

TUSIA: KAREN COLLUM - SIGNS OF THE TIME



OE iai nisi o alo o Samoa sa o e ao'oga i Iunivesite i Amerika, Ausetalia, Niu Sila ma isi atunu'u eseese e toe fo'i mai i Samoa ua liua o latou manatu e faatatau i a'oa'oga faakerisiano. E toatele nisi ua ou talanoa iai ua toe fo'i mai e le gata ua fesiligia le moni o le iai o le Atua, ae faapena fo'i i o latou lava faatuatuaga.

O le lu'i o lo o feagai ma matua o le faaaaua lea o le pasi atu o le upu o le faatuatuua i o latou alo ma le faamoemoe ia tumau ma ia sili atu lo latou naunau i le Atua. Faimai le Tusi Paia "ia a'oa'o le tama e tusa ma ona ala a matua e le toe te'a ese ai." (Faataoto 22:6). E faapefa ona a'oa'o fanau ia le toe te'a ese i a'oa'oga moni ma le sa'o?

Se i vaavaai i su'esu'ega sa faia pe iai se tali i le fesili: ma e faalagolago fo'i i le tulaga o le faafitauli.

O le a se tala mai sailiiliga?

E mafai lava ona sailiili i le google au lava suesuega e faatatau i itu lelei ma le leaga o le aoaoina o fanau. Ae o sailiiliga i le vaega faapitoa i itu tau mafaufau saikolosi (psychology). I itu lelei o le a'oa'o o fanau i ala o le Atua ma ona faafitauli. Se i o tatou amata

mai i itu faafitauli.

Faatuatua Faaleagamea

E le o faatuatuaga uma e lelei ma maloloina mo fanau. E le o tagata uma e faimai e faaali lo latou faatuatua ma le iloa o le Atua e iai uiga o le alofa, faapelepele, mutimutivale, ma amioga e fofoa ai le amio lelei i fanau. O le tele o nisi o mea tutupu ma le sauaina o fanau e fesoota'i lelei ma mea tau talitonuga.

I le tele o tala salalau i faasala-lauga ma tala fou i lea aso ma lea aso tatou te maua ai nisi o uiga mataga e faatino lava i totonu o aiga, ta'ita'i o tapuaiga, ma i latou e taua o tagata lotu. E matua faamo-moiloto ma le talitonu i nisi o sauaga e faia i

fanau i totonu o ekalesia ma faatuatuaga e ta'u ai le suafa o le Atua.

1. FAATUATUAGA E LEAI SE TAULAIGA

Tapuaiga e fai i Vaaiga a Tagata - o ituaiga talitonuga ia e faavae i luga o le lelei mo le vaaiga lautele a tagata ae leai se loloto i totonu o le loto o le faatuatua - ua faamaonia le tele ina fesoota'i ma sauaga o fanau. O le vaivai o le faatuatua o le ono lilifa atu fo'i lea o le matua i le uiga faasaua i fanau. Na maua i ni suesuega i le

2005 e ni Tusitusiga Faasaikolosi ma le FaaMataupu Silisili e le o le talitonuga i le Atua le faafitauli ae o le olaga faafoliga ma le tapuaiga fai i le vaaiga a tagata e mafua ai ona aafia matua i sauaga o fanau.

2. TAPULA'A LE AUSIA

I le 2012, sa faia ai se suesuega i Ausetalia ma maua ai o se tasi o tulaga faamomoiloto o aiga lolotu: o tapula'a le ausia e afua ai le mapelepele o aiga. Ua maualuga tele tapuala'a faatulagaina ma mea e mananao tagata matutua e ausia e fanau. O le mea lea ua mafua ai ona oo i lagona o fanau le maasiasi ma le faalumaina pe a le ausia vaega uma e ao ona latou ausia. O lagona o le ma ma le toilalo e fesoota'i atu ma le atu ma le taotaomia o le mafaufau laititi o le tamaititi. O suesuega faa Saikolosi ua lipotia ai o matua e maualuga tele a latou sini ma tapuala faatulaga e ausia e fanau, e tele lava ina faia sauaga i fanau ina faia le mea latou te loto iai. O ia uiga e aafia ai le mafaufau manuia o le tamaititi, ae faapea fo'i i lona tupututpu a'e ma faaaauau atu lava lena aafiaga i lona ola se ia oo ina matua ma faapena fo'i ona faia i lana fanau.

3. TAOFIOFI MA LEAI SE FETUUNA'I

O Suesuega Faasaikolosi o le 2019 na ripotia i se Tusi na tusia ai ai e sili atu le mafaufau fetuutuuna'i o tamaiti e ola i aiga le lolotu nai tamaiti e ola ma taus i aiga e lolotu. Na maitauina ai e tagata su'esu'e o le soona faamalosia o fanau e taus



tapula'a e mafua ai ona iai ni itu le lelei i fanau. Ae maise le le mafai e i latou ona fetuutuuna'i o latou mafaufau e faatatau i isi tagata. E iai fo'i ma le talitonuga o i latou e mafaufau e taofiofi ma tamau i o latou talitonuga e aafia ai ma itu e matele iai o latou talitonuga faapolokiki.

Itu Lelei o le Lotu

E anoanoa'i sailiga o le lelei o le tausi lelei o fanau i aiga e toaga i lotu i o latou lagona, mafaufau, va ma isi ma isi lava mau itu lelei e tele. Ae o nai vaega iti nei mo le silafia.

1. FAAITIITIA O LE OLA SOONA FAI

I se lomiga na faia i Amerika e le Sosaiete o i latou e Sailia Fesoootaiga o

le Soifumaloloina ma Fofo i Faama'i pepesi, na o latou faamaonia ai o i latou uma na ola i ni aiga e toaga e tatalo ma faatasi i faatasiga a lotu, e sili atu le faamalieina o i latou ina ua atoa o latou tausaga tai 20 - e leai pe ititi le auai atu i le faaogaina o fualau faasaina, laiti pe leai ni faigafafeusuaga, ma e lelei ma maloloina lelei lo latou ola i le tino ma le mafaufau. I le aotelega, e matua sili atu le tele o itu lelei o le toaga i le lotu o fanau.

O le isi su'esu'ega mo Fanau Sauaina ma Tuulafoa'ia i le 2008 na maua ai o le toaga i le lotu e faatpulaia ai le manuia o le mafaufau, ae maise lava mo i latou sa le lelei le tausaina a o laiti.

2. TOAGA I LE LOTU, MA OLA FIAFIA

O le sailiga i le 2013 e Fomai Sainklosi na maua ai o tamaiti e toaga i lotu e silia atu ona faamaliena o latou loto. I le taimi o le tau atina'e o amio a fanau, o le auai atu i faagaoiiga i le lotu e aveese ai o latou mafaufau mai le tosina atu i mea leaga e aafia ai o latou ola tuputupua'e ma e fesoasoani tele i le faatpulaia o lo latou fiafia e tafafao ma felagolagoma'i ma isi fo'i tamaiti latou te tupulaga faatasi.

3. LELEI TOGI I LE AOGA

E faamaonia fo'i o fanau aupito i toaga i lotu ma faagaoiiga a lotu e lelei atu o latou togi i aoga nai lo i latou e le o i ni lotu. O se tasi o faamatalaina o le mafuaaga o lea itu ona e atina'e i le faifaimea faatasi ma isi tamaiti le mafaufau tau le va

fealoaloa'i ma isi tagata ma e faatupulaia ai le naunau ia lelei ma manuia taumafaiga i le aoga.

O fea e aga'i iai?

O le malamalamo o matua i mea faaletonu i le tuputupu a'e o tamaiti i totonus o aiga lotu e fesoasoani tele lea ia alo ese mai ai. Ae o le manino i auala lelei e ola a'e ai fanau i siosiomaga lelei e faavae i tulafono a le Tusi Paia, e faafaillele ai fanau se ia oo ina matutua. E tusa ai ma su'esu'ega sa faia, o auala nei e tausia lelei ai fanau i aiga lotu:

1. FAATUPU LOU FAATUATUA

O le faatuatua faafoliga ma le papa'u e leai se mea mautu e taula iai. E faaleaga ai le faatuatua ma le faafailleleina o fanau. O lo tatou tiute faale-mātua le faafaillele o lo tatou faatuatua se ia oo ina loloto ma faamaoni i le Atua. Ia faatupula'ia lou lava faatuatua ona avea lea ma se mea e fua mai lou lava olaga. Ona faigofie lea ona e faasoa atu ma le faaeteete i lau fanau.

2. AUA LE FEFE E FESILI MO SE FESOASOANI

Ia fetala'i lou mafaufau ma e vaai mai i isi itu o le faafitali ae aua le tamau pe ta pitotasi i se mea ua e iloa. Ia e finau ma fesili i mea e fetoai ai le faatuatua ma tulaga tau faasainenisi, ma le talutalu fou, ma ia naunau e tali fo'i fesili a lau fanau e faatatau i faafitali masani o le olaga. O le tali masani a matua Samoa e faapea "fai le mea lea ou te faiatu ai", e lelei ae

ua avea ma mea e vave faamoe ai isi faafitali e tatau ona foia. O le mea lea e toe alia'e ai faafitali mulimuliane ae ua faigata na fofo.

3. AVE LAU FANAU I LE LOTU MA FAAGAOIIGA A FANAU

Ave lau fanau i so o se mea e faia ai mafutaga faaleautalavou faaleaga-ga. Pe o e tafafao i le paka pe fai se togalauapiga i se nofoaga e ese mai le fale. Afai e leai sau ekalesia, su'e se ekalesia lata ane e fai ai fuafuaga faapena mo fanau. O le tele o le o o fanau e mafuta ma isi tamaiti o le lelei fo'i lena o le atina'eina o le iloa o le va ma isi tagata

4. TATALO MO LAU FANAU

E tele molimau a matua na liua ma sua olaga o a latou fanau ona o le malosi o lo latou tatalo. Ia avea o sau masani le momoli atu o lau fanau i le nofoalii o le Atua i taeao ma po uma. O se tiute lea e le mafai ona ritaea ai se matua.

E faapitoa lava fanau i le finagalo

ua Iesu. Ma e leai se mea na te natia mo oe ma a'u pe a tatou ole atu ina ia faia mo Lana fanau. O le mafuaaga lea na ia fetalai ai, "Ina tuu mai ia o tama iti e o mai ia te au, aua le vaoia i latou" (Mataio 19:14). Ia momoli tamaiti ia Iesu e ala i le ave i le lotu ma a'o'o i Ona ala moni. Jesus had a special place in His heart for children. O se meaalofa sili le pasi atu iai i fanau o le faatuatua ola. A faufau lelei lava mea tatou te faia e fofoa ma fafailele ai fanau, e ala i le lelei o a tatou sootaga ma mafuta ma i latou, ma faataua lo latou savaliga i le faatuatua, e mafai e aiga lotu ona fesaga'i ma lu'i o le taufaaleaga mai i fafo atu o le li'o o le aiga.

Tusia e Karen Cllum - mai le Signs of The Times. - Lomiga luni, 2021

ASAM STOCK IMAGES



Eseesega o UPUMONI

ma
mea sese

E tele le eseесega o le upumoni ma le mea sese.. e ui lava e faimai nisi e le taua tele lea eseесega. O lo o faapea mai i latou nei, e leai se eseесega pe afai e faamaoni le loto. Ae matua manino mai i faamaoniga o le Tusi Paia, tuu le tagata e faamaoni lona loto i se mea pepelo ma sese, e fano le iuga o le tagata e fiafia i le mea sese, pepelo ma leai se amiotonu. E mafai ona faapea mai uma tagata e tatau ona tatou tapua'i atu i le Atua i le agaga ina ia talia ai, ae e taua ma algatatau fo'i le tatau ona tapua'i atu i le Atua faamaoni i upumoni. Talu ai ona o le Atua e tonu ma faimea sa'o, e leai se avanoa e mafai ai ona ia talia ituaiga manatu e faapea mai e le taua tele le fesili o le sa'o po o le sese. O le mea lea e taua ai ma tatau ona fai le fesili, o le a le upumoni?

Talu ai na afio mai lesu e faailoa ma molimau le mea moni, se i o tatou faaologo atu i lona molimau mai i lenei mataupu. I lana tatalo olega e fai ai o ia ma su'i o ona so'o, sa tatalo atu ai faapea, "la e faapaiaina i latou i lau upu moni; o lau afioga o le upu moni lea." Ioane 17:17.

O Upu malele mai i le fofoga o le Atua o le upumoni lea; ma e leai se vaega na ia faailoa e ala ia ana auauna perofeta ma aposetolo e maualuga atu lo latou taua nai lo Tulafono e Sefulu na ia fofogaina i luga o le mauga o Sinai. Sa faaosofia foi e le Agaga Paia le fai salamo o Tavita e tusia upu nei, "O lau amiotonu o le amiotonu e faavavau lea; o le mea moni foi lau tulafono." Salamo 119:142. "Ua latalata mai oe leova e; o au poloaga uma foi e moni lava ia". Fuaiupu 151. O tulafono e sefulu o upumoni ia, aua o faavae le masuia ia o upu moni, mea tonu, ma amioga tonu. O le tasi o tulafono e faapea mai "Aua ne i faia se atua ese i o'u luma," o le mea moni aua e leai lava se isi Atua. Ma o tulafono taitasi uma o lo i totolu o tulafono e sefulu latou te faamatalaina upumoni tetelu taua. O le tulafono o le Sapati e faapena fo'i ona tutusa ma isi tulafono i le faailoa o le mea moni. O lo o faapea mai, "Na faia e le Atua le lagu, ma le sami, ma mea una o lo o iai, ona malolo ai lea i le aso fitu." E le mafai ona faaleaogaina pe suia lea tulafono. O se mea moni na tupu ma e le mafai ona toe faao'i. Talu ai ona o i tatou o Lana foaoaga, e tatau ai lava ona tatou ava ia te ia lo tatou Foaofa, e ala i le manatua o Lona aso na malolo ai ina ia faapaiaina.

O le faaleaogaina o le tulafono a le Atua o le faaleaogaina lava fo'i lea o le upumoni. O le suia o so o se vaega o ana tulafono "o le suia lava lea o le upumoni a le Atua e fai mea pepelo." O le tausia o le ulua'i aso ma aso Sapati, e tutusa ma le malolo o le

Atua i le ulua'i aso, ae galue i aso e ono, ae le o se mea moni lea gaioiga. O le mea lea ua faimai ai Tavita, "E moni lava lau afioga talu le amataga; e faavavau foi au faamasinoga tonu uma lava." Fuaiupu 160. O ana tulafono uma ia o upumoni ma le amiotonu; aua ua faapea mai le Atua o lana amiotonu e le mafai ona matineia. "E ta'u atu le viiga i o'u laugutu, pe a e a'oa'o mai ia te au i au tulafono." Fuaiupu 172. Na faapea atu le Atua ia Isaia, "...a o la'u faaolataga e faavavau lava lea, ma le amiotonu mai ia te au o le gausia lava lea... Faalogo mai ia ia te au, outou o e ua iloa le amiotonu, o le nuu ua i o latou lotu la'u tulafono." Isaia 51:6, 7.

O le tulafono o le upumoni lea, aua ua faapea mai lesu, "Aua ne'i outou manatu ua ou sau e tatalaina le tulafono po o le au perofeta; ou te lei sau e tatalaina, a ia faataunuina. Auā e moni, ou te fai atu ia te outou, e mavae atu le lagu ma le lalolagi, a e le mavae atu lava se iota po o sina fasi mataitusi o le tulafono, seja taunuu mea uma. O lenei, o se na te tatalaina se poloaga e tasi e aupito itiiti o nei poloaga, ma faapea ona a'oa'o i tagata, e ta'u ia e aupito itiiti i le malo o le lagu; a o se anaana ma a'oa'o ai, e ta'u ia e sili i le malo o le lagu." Mataio 5:17-19. Na faamaufaailogaina e lo tatou Alii le molimau lenei e ala i lona maliu mo a tatou soligatulafono; ma ua faamaonia a'ia'i ai ma le mautinoa e faavavau o le moni ma le amiotonu o lo o i le tulafono.

...E iai ma le mea e taua o le "upu moni mo le taimi nei", 2 Peteru 1:12. O le upumoni ua momoli mai ai e le Atua i le Faaaliga 14:9-12, e toe fuataina ai upumoni uma ua faaleaogaina, ina ia tapenaina ai toe tagata faamaoni e faatali mo le liuaga i le toe afio mai o lo latou Alii o lesu Keriso, ua lata tele mai, ma ua i fai toto'a lava. Elena Uaita - Upumoni [R. F. Cottrell - Truth]

Matthew is called.	ST. MATTHEW, 9.	Jairus' daughter raised.
Ansio DOMINI XI 31.	said within themselves, This man is a sinner.	¶ ¶ ¶ And, behold, a woman, which had twelve years, came behind him, and touched the hem of his garment.
4 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	4 And Jesus, knowing their thoughts, said unto them, Every one of you which doeth this sin, is like unto her.	¶ For she said within herself, If I touch his garment, I shall be whole.
5 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	5 And when he was欲 to say, "Thy sins be forgiven thee; thy sins be forgiven thee."	¶ ¶ ¶ And when he had called her, she came, and touched his garment, and he said, "Daughter, be of good comfort; thy sins be forgiven thee."
6 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	6 And when Jesus saw that they might know that the Son of man had power over to forgive sins, then saith he to the man which sinned, "Arise, and take up thy bed, and go unto thine house."	¶ ¶ ¶ And when Jesus had said this, he arose, and departed to his house.
7 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	7 And he arose, and departed to his house.	¶ ¶ ¶ And when Jesus came into the ruler's house, he saw a woman lying on a bed, which was made whole from thenceforth.
8 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	8 But when the multitudes saw that Jesus passed by, they ran after him, and when he was come near, he saw a man named Jairus, which was a ruler of the synagogue, and he came to him, and fell down at his feet.	¶ ¶ ¶ And when Jesus came into the ruler's house, he saw a woman lying on a bed, which was made whole from thenceforth.
9 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	9 And when Jesus was yet far off, they said unto them, "Give place; for the man is dead, and he cometh to bury him."	¶ ¶ ¶ And when Jesus was yet far off, they said unto them, "Give place; for the man is dead, and he cometh to bury him."
10 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	10 And when Jesus heard that, he said, "Fear not: only believe."	¶ ¶ ¶ And when Jesus heard that, he said, "Fear not: only believe."
11 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	11 And he suffered him to come in, and took him by the hand, and said unto him, "I will make thee whole."	¶ ¶ ¶ And he suffered him to come in, and took him by the hand, and said unto him, "I will make thee whole."
12 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	12 And when the people were informed thereof, they began to follow him: and there were many people.	¶ ¶ ¶ And when the people were informed thereof, they began to follow him: and there were many people.
13 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	13 But when Jesus saw that, he said unto them, "Give place; for the man is dead, and he cometh to bury him."	¶ ¶ ¶ But when Jesus saw that, he said unto them, "Give place; for the man is dead, and he cometh to bury him."
14 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	14 And when Jesus was yet far off, they said unto him, "Master, the man at your house is dead."	¶ ¶ ¶ And when Jesus was yet far off, they said unto him, "Master, the man at your house is dead."
15 Psa. 159, 2. 1 Cor. 1, 12. Mark 2, 12. John 4, 12. & 6, 12. 1 Cor. 1, 12. & 11, 12.	15 And Jesus said, "It is not lawful to leave the dead: but go, tell his brother James, and Judas, and Simon the Cananite, and Judas the Lebbona, whose surname was Thaddaeus, that I will come to him."	¶ ¶ ¶ And Jesus said, "It is not lawful to leave the dead: but go, tell his brother James, and Judas, and Simon the Cananite, and Judas the Lebbona, whose surname was Thaddaeus, that I will come to him."

ALAATA O LE FAAMOEMO **HOPE** CHANNEL



Maimoa i le alaata e suia ai olaga i upumoni e momoliina mai ai. Maimoa faafofoga i luga o le ala ata Channel 11 i le Moana Cable TV, po o luga o upega tafailagi. Saili mo le igoa Hope Channel American Samoa.



HopeChannel
AMERICAN SAMOA

www.asamtv.org
684 699 4338

